

Grupo 5 di Formacion Social cu demostracion di entrenamiento militar



ORANJESTAD - Cursistanan di Formacion Social Grupo 5 a duna tremendo demostracion di tur loke a siña den prome 4 luna di entrenamiento militar. E grupo cu a cuminsa nan trayecto na januari ultimo na Marinierskazerne, a yega na e punto mas importante di e ultimo 4 lunanan. E prome fase di nan entrenamiento cu ta dura un total di 1 aña a yega su final. E grupo ta cla pa cuminsa e siguiente fase, cu ta inclui varios curso na Enseñansa pa Empleo, despues un periodo di stage y tambe ta sigui cu e entrenamiento fisico. Durante un ceremonia teni recientemente na Marinierskazerne na Savaneta, e grupo di 20 hoben, cu a termina e prome fase a haya oportunidad pa demostra nan famia y amistadnan, pero particularmente e mayornan orguyoso, algo di locual nan a siña y entrena pe den e ultimo 4 lunanan.

Marcha militar

E hobennan a cuminsa dunnando un demostracion di marcha militar cu nan a siña y practica bou di e supervision di militarnan di AruMil. Marcha militar ta parti integral di cualkier entrenamiento basico militar y e hobennan a demostra cu nan a capta e sistema di comando asocia cu e actividad militar aki y tin e bou control. Marchando e hobennan mester a demostra e diferente tecnica di marcha den grupo, manera mantene aliniacion cu e personanan dilanti, controla e espacio cu e personanan rond di dje. Tur esaki, combina cu arma di entrenamiento den man corectamente.

Curso di obstaculo

Despues a sigui un demostracion di e curso di obstaculo cu tin na Marinierskazerne. Esaki ta e mesun curso cu militarnan ta entrena riba dje y e 20 hobennan a haya hopi aplauso for di tur esunnan presente ora nan a caba e trayecto. Ora a finalisa e curso

di obstaculo, e 20 hobennan a para den formacion y ora cu nan oficial a duna nan e señal, a tira nan pechi den halto y a bisti un baret militar. E ultimo aki ta un muestra cu nan a logra pasa e prome fase di e trayecto di Formacion Social cu exito. Un momento semper special. Un barera a wordo surpasa.

Na final tur presente a tuma asiento den e edificio 'Gouden Bal' caminda a pasa un film di varios actividad di e trayecto. Algo cu sigur a trece hopi emocion y recuerdo pa e hobennan y tambe nan famia. Despues di e film cada cursista a haya un certificado for di Marinierskazerne como muestra di nan trabounan den e ultimo 4 lunanan cu a pasa. Adicional nan a haya un certificado tambe for di Teen Challenge pa curso nan cu nan a sigui y tambe nan carnet di E.H.B.O. E ultimo aki ta despues cu nan a logra exitosamente completa e curso otorga pa Rode Kruis. Prome Minister Mike Eman y Teniente Texeira a felicita y entrega cada un di e cursistanan nan papelnan corespondiente. Formacion Social ta un iniciativa di Prome Minister Mike Eman cu a cuminsa durante su prome Gabinete. Den diferente grupo a logra reforma e bida di un cantidad di hoben for di un bida sin direccion determina pa un meta basa riba disciplina, estudio y capacitacion.

Siguiente grupo

Na augustus proximo ta cuminsa e siguiente grupo cu ta #6, mientras cuminsando awe dialuna e inscripcion pa grupo #7 ta cuminsa. Grupo #7 ta cuminsa su trayecto na luna di januari 2015. Esunnan interesa pa registra nan mes of mayornan, famia y amigonan cu ta desea di haya mas informacion, por tuma contacto cu lider di proyecto Sra. Jessy Ras na telefon 522-5352. □